

চর্যাপদের পাঠ আলোচনা



মুহম্মদ শহীদুল্লাহ

আমি ৪৮ বর্ষের ২য় সংখ্যা সাহিত্যপরিষৎ পত্রিকায় 'বৌদ্ধ গান ও দোহার পাঠ আলোচনা' প্রবন্ধে চর্যাপদের পাঠ আলোচনা করিয়াছি। ইহার পর কয়েকটি চর্যাপদ সম্বন্ধীয় পুস্তক প্রকাশিত হইয়াছে। তন্মধ্যে পরলোকগত বন্ধুবর ডঃ প্রবোধচন্দ্র বাগচী এবং শান্তিভিক্ষু শাস্ত্রী সম্পাদিত চর্যাগীতিকোষ (১৯৫৬) বিশেষ উল্লেখযোগ্য। ইহাতে মূলের প্রাচীন তিব্বতী অনুবাদ এবং সম্পাদকের সংস্কৃত অনুবাদ আছে। ইহাতে মূলের পাঠের সংশোধন করা হইয়াছে। আমি এই প্রবন্ধে লিপিতত্ত্ব ভাষাতত্ত্ব, বা ছন্দ অনুযায়ী যে পাঠ শুদ্ধ হয়, তাহার আলোচনা করিব না। এখানে কেবল দৃষ্টান্ত স্বরূপ প্রথম চর্যার বিশুদ্ধ পাঠ দিতেছি, — পাঞ্চ, পইঠা, দিচ, লুই পুছিঅ, মরিঅই, ছান্দ বান্দ, কপটের, স্নুহু, ভিড়ি, লেছ, ঝাণে, দৌঠা, চবণ, পিণ্ডী, বইঠা। ইহার অনেকগুলি চর্যাগীতিকোষে স্বীকৃত হইয়াছে। আমি তাহা মোটা হরফে দেখাইয়াছি। আমি এই প্রবন্ধে সেই সকল পাঠ আলোচনা করিব, যাহাতে অর্থগত পার্থক্য ঘটে।

৬নং। মূল তরঙ্গতে, টীকায় তরংগতে। বাগচী তরসঁস্তে। তাঁহার সংস্কৃত অনুবাদ ত্রাসাৎ। মদীয় তরঙ্গতে। তরঙ্গ শব্দের এক অর্থ সংস্কৃতে gallop (of a horse)। মধ্য বাঙ্গালায় হরিণের উল্লম্বনকে তরঙ্গ বলা হইয়াছে।

রূপসী হরিণ হয়া আপনি অভয়া।

ব্যাধের সম্মুখে আসি পাতিলেন মায়া ॥

রৈয়া রৈয়া ঘান মাতা দীঘল তরঙ্গ।

ভার পাছে ব্যাধ যেন উড়য়ে পতঙ্গ ॥

(কবিকঙ্কণ চণ্ডী)

তিব্বতীতে 'ফ্যোঙ্, স্ শিঙ্, ফ্যোঙ্, স্ প ধাতুর অর্থ লাফ দেওয়া।

ত্রাস হেতু হরিণের খুর দেখা যায় না — বাগচীর অনুবাদ।

উল্লম্বন হেতু হরিণের খুর দেখা যায় না — মদীয়।

বাগচী তিব্বতীর অর্থ ‘সংক্রমণ ধাবনাৎ’ করিয়াছেন। ইহাতে তরঙ্গ শব্দের অর্থ উল্লম্বন দাঁড়াইতেছে।

৮নং। মূল মহিকে ঠাবী। বাগচী — নাহিক ঠাবী। তাঁহার সংস্কৃত অনুবাদ নাস্ত্যেব স্থানং। মদীয় — মহীকে ঠাবী। আপত্তি এই যে, প্রাচীন বাংলায় স্বার্থে ক (নাহিক) নাই। ২য়া, ৪র্থী এবং ৬ষ্ঠী বিভক্তিতে “কে” হয়।

সোনে ভরিলী (ভরিতী) করুণা নাবী।

রুপা খোই মহিকে ঠাবী ॥

বাহ তু কামলি গগণ উবেসেঁ।

অর্থ হইবে — সোনায় (শূন্তে) ভরা করুণা (= মায়া) নৌকা। রুপা (= রূপ) খুইয়া পৃথিবীর (= সংসারের) ঠাঁই, রে কামলি, গগন (= মহাসুখচক্র) উদ্দেশে তুই বাহ।

এই অর্থ অতিসঙ্গত। যখন সোনা বোঝাই নৌকায় রুপার ঠাঁই নাই, তখন তাহা মাটিতে রাখিতে হইবে বই কি?

বাগচীর খোই-এর অর্থ স্থাপয়িত্বং প্রাচীন বাংলায় হয় না। ইহার অর্থ খুইয়া (স্থাপয়িত্বা)।

১৪নং। তহিঁ বুড়িলী মাতঙ্গী পোইআ লীলে পার করেই।

তিব্বতী পাঠের ডঃ বাগচীর প্রথম সংস্কৃত অনুবাদ — তত্র প্রবিশ্য মতঙ্গ-কস্তা লীলয়া মুক্তং করোতি। (Materials for a Critical edition of the old Bengali Caryapadas)। চর্যাগীতিকোষে তাঁহার অনুবাদ — তত্র মগ্না (আরুঢ়া) মতঙ্গপোতিকা লীলয়া পারং কুরুতে। তিনি মূলের পাঠ পরিবর্তন করেন নাই। আমার সংশোধিত পাঠে ‘বুড়িলী’ স্থানে চড়িলী। এশিয়াটিক সোসাইটি অব বেঙ্গলের প্রতিলিপিতে চুড়িলী। চর্যাপদে ব এবং চ-এর মধ্যে গোলযোগ আছে। সংস্কৃত টীকা স্থিহা, তিব্বতী অনুবাদ শুগ্‌স্। ডঃ বাগচী তাহার অনুবাদ করিয়াছেন ‘that which enters’; কিন্তু ইহার অনুবাদ হইবে চড়িলী = আরুঢ়া। চর্যার শেষ চরণে আছে চড়িলী; তাহার তিব্বতী অনুবাদে আছে শুগ্‌স্। তাহার পর

পোইআ শব্দে তিনি সংস্কৃত টীকা অনুযায়ী যোগীন্দ্র হইতে জোইআ পাঠ প্রথমে গ্রহণ করিয়াছিলেন। অথচ তিব্বতীতে ইহার অনুবাদ নাই। তাঁহার প্রথম সংস্কৃত অনুবাদের মতঙ্গ-কণ্ঠা স্থানে শেষ অনুবাদে মাতঙ্গ-পোতিকা করিয়াছেন যুলের মাতঙ্গ পোইআ অনুযায়ী। কিন্তু সংস্কৃতে পোতিকা শব্দের অর্থ a potherb. সুতরাং এই পোতিকা অনুবাদ অসঙ্গত। প্রাকৃত্তে পোইআ শব্দের অর্থ নিমগ্ন (ঐষ্টব্য পাইঅ-সদ-মহগ্ন ব)। আমার চুড়িলী স্থানে চড়িলী পাঠে ঐ চরণটির অর্থ হইবে — তাহাতে (নৌকায়) আক্রাণ মাতঙ্গী নিমগ্নকে অবলীলা ক্রমে পার করে। ইহাই সঙ্গত। ডঃ বাগচী সংস্কৃত অনুবাদে মগ্না শব্দের পর বন্ধনী মধ্যে আক্রাণ কোথা হইতে পাইলেন, জানিনা।

এই চর্যাপদের শেষ চরণে আছে —

জো রখে চড়িলা বাহবাণ জাই কুলে কুল বুড়ই।

ডঃ বাগচীর সংশোধিত পাঠে 'বাহবা ন জাই', সংস্কৃত অনুবাদে বাহয়িতুং ন যাতি (পারয়তি)। মদীয় সংশোধিত পাঠ — জো রখে চড়িলা বাহবা ন জানি কুলে কুল বুলই। 'ন জানি' সংস্কৃত টীকা 'অপরিচয়েন' এবং তিব্বতী 'মিশেস্' ইহার সমর্থক। ডঃ বাগচীর পূর্বের তিব্বতী অনুযায়ী সংস্কৃতে অনুবাদে ছিল 'ন জানাতি'। তিব্বতী অনুবাদ 'ব্যাঙ অনুযায়ী বুড়ই sinks পাঠ হয়। কিন্তু সংস্কৃত টীকা 'ভ্রমস্তি' অনুযায়ী শুদ্ধ পাঠ হইবে বুলই wanders. লিপিতে ল এবং ড-এর মধ্যে গোলযোগ আছে। অর্থের দিক হইতে এই পাঠই সঙ্গত। ডঃ বাগচী পূর্বে বুলই পাঠ গ্রহণ করিয়াছিলেন। শেষে কিন্তু বুড়ই পাঠ স্বীকার করিয়াছেন। বুড়ই পাঠে চরণটির অর্থ হইবে — যে রখে চড়িল (নৌকা) বাহিতে না জানিয়া কুলে কুলে ডোবে। রখে চড়িয়া কুলে ডোবা হাশ্বজনক। বুলই পাঠে অর্থ হইবে — যে রখে চড়িল, (নৌকা) বাহিতে না জানিয়া কুলে কুলে পরিভ্রমণ করে।

১৫নং। কণ্ঠারা। ডঃ বাগচী কঙ্কারা। মদীয় কণ্ঠারা। মধ্যেযুগের বাংলায় কাণ্ডার তাঁবু অর্থে পাওয়া যায়। ইহা সংস্কৃত কঙ্কাবার হইতে ব্যুৎপন্ন, অর্থ camp.

মূল — সূনা পাস্তুর। ডঃ বাগচী ইহার অর্থ সংস্কৃতে 'শূন্য প্রাস্তুর' করিয়াছেন। মদীয় পাঠ সূনা পস্তুর। তিব্বতীতে স্তোঙ্ প'ই লম্ = শূন্যের পথ। সূতরাং মদীয় 'শূন্য পথের' এই অর্থই ঠিক।

১৪নং। উছারা — সংস্কৃত উৎসুর। উছর হয়েছে বেলা (মাণিকরাম-ধর্মমঙ্গল)। অর্থ অপরাহ্ন।

১৬নং। মূল — তুসেঁ ঘোলই। ডঃ বাগচীর সংস্কৃত অনুবাদ তুষেণ (with chaff) ঘূর্ণতে। মদীয় তুসেঁ = তুষায়, সংস্কৃতে তুষয়া। তুষায় ঘুরিয়া বেড়ায়। এই অনুবাদ সঙ্গত। তুষের দ্বারা ঘোরে, হাস্তজনক।

১৭নং। সারি সূনিআ (বাগচী)। সারি মুণিআ (মদীয়), Tib. শেম্ = জান। প্রাকৃতে মুণ্ ধাতু জানা অর্থে, সংস্কৃত মন্। প্রতিলিপি মুণেআ।

করহা — সংস্কৃত করভ। প্রাকৃত করহ = উষ্ট্র (দ্রষ্টব্য পাইঅ-লচ্ছী)। সরহপাদের দোহায় করহা = উষ্ট্র।

১৮নং। মূল—সঅল বি টালিউ। অর্থ — সকলং নাশিতং (বাগচী)। সঅল বিটালিউ = সকল অশুচি করিলি (মদীয়)। বাগচীর অর্থ সংস্কৃত টীকা অনুয়ায়ী। কিন্তু প্রাকৃতে বিটাল = অস্পৃশ্যসংসর্গ (দ্র. হেমচন্দ্র ৮।৪।৪২২)। সিন্ধী ভাষায় বিটার = অশুচি করা; মারাঠী বিটাল = অপবিত্রতা; গুজরাটী বিটাল = ঋতুমতী নারী।

১৯নং। মূল—উছলিআ, পরের চরণে চলিআ। উছলিলা, চলিলা (বাগচী)। উছলিআ অসমাপিকা ক্রিয়া; চলিয়া = সংস্কৃত চলিত। অতীত কালে ইয়া। সূতরাং বাগচীর পাঠ পরিবর্তন অনাবশ্যক।

২০নং। খমন = খমনস্, শ্রমণ (বাগচী)। শ্রমণ হইতে খমণ ব্যুৎপন্ন নয়। ইহা ক্ষপণক হইতে, জৈন প্রাকৃতে খমণ, প্রাকৃতে খবণ, অর্থ জৈন কিংবা বৌদ্ধ সন্ন্যাসী। ইহার গূঢ়ার্থ খ = শূন্য + মন। বাহ্যার্থই সঙ্গত। তিব্বতী গূঢ়ার্থ লইয়াছে।

২১নং। মূল—নিসিঅ অক্ষারী সূসার চারা।

নিসি অক্ষারী মুসা অচারা (বাগচী)।

নিসিত আক্ষারী মুসার চারা (মদীয়)।

অর্থ — নিশা অন্ধকারবতী মূষক আচরতি (বাগ্‌চী) । আঁধার নিশায় মূষিকের চার (খাচ) (মদীয়) ।

নিশিত — ‘ত’ অধিকরণে । চারা = চার ; হিন্দীতে জন্তুর খোরাক, আসামীতেও এই অর্থ ।

মূল — চরঅ অমন ধান ।

করঅ অমিঅ পান (বাগ্‌চী) ।

চরই আমন ধান (মদীয়) ।

সংস্কৃত টীকা — মধুপানাস্বাদনং কৰোতি । ইহা গূঢ়ার্থ । বাহ্যার্থ, আমন ধানে চরে ; ইন্দুরের পক্ষে ইহা সঙ্গত ।

মূল — খগঅ গাতী । বাগ্‌চী ঐ । খগই গাতো (মদীয়) । অর্থ — খনতি গতিং (বাগ্‌চী) । খোড়ে গর্ত (মদীয়) । সংস্কৃত গর্ত, প্রাকৃত গত্ত, প্রাচীন বাং গাত ; গাতো চরণান্তে ওকার, যথা রত্তো, উন্নত্তো (চর্যা ১৯) ।

মূল — চঞ্চল মুসা কলিআঁ নাশক খাতী । বাগ্‌চী ঐ । খা তো (মদীয়) । চঞ্চল মূষক (:) কবলয়িত্ব নাশকঃ স্থিতেঃ নিষ্কেপস্ত বা (বাগ্‌চী) । চঞ্চল মূষিক বুঝিয়া নাশের জন্তু থাক্ তুই (মদীয়) । নাশক = নাশের জন্তু, ‘ক’ বিভক্তি তাদর্থো । কলিআঁ = সং, আকলয়া = বুঝিয়া ।

মূল — মুষা এর চা । মুসা অচার (বাগ্‌চী) । মুসাএর চারা (মদীয়) । অর্থ — মূষকস্ত আচরণং (বাগ্‌চী) । মূষিকের চার (মদীয়) ।

২৬নং । মূল — বহল বট । বহল বট (বাগ্‌চী) । বহন বাট (মদীয়) । অর্থ — বহলং বৃদ্ধং = অতিসান্ন very much compact (বাগ্‌চী) । চলন পথে (মদীয়) ।

জনাব সৈয়দ মূর্তাজা আলীর মতে অসমীয়া ভাষায় বহল বাট ‘বিস্তীর্ণ পথ’ অর্থে । ইহা গ্রহণযোগ্য । ‘বহন বাট’ পাঠ তিব্বতী ‘বব্ লম্ অল্পযায়ী ।

মূল — দুই মার । বাগ্‌চী ঐ । দুই আর (মদীয়) । বাগ্‌চী মার্গ হইতে ‘মার’ ব্যুৎপন্ন মনে করেন । ইহা অসম্ভব । সং টীকা ‘দ্বয়াকারং’ । দ্বয়াকার (মদীয় অর্থ) ।

৩২ নং। মূল — পার উআরে" সোই গজ্জিই
 দুজ্জন সাজে অবসরি জাই ॥
 পার উআরে" সোই মজ্জিই ।
 দুজ্জন সজে অবসরি জাই। (বাগ্‌চী)
 পার উআরে জোই সীঝই ।
 দুজ্জন সজে অবস মরি জাই ॥ (মদীয়),

সং টীকা সিদ্ধিঃ প্রাপ্নুবন্তি তে (যোগিবরা :) । ইহার অর্থ যোগী সিদ্ধি পায় । অতএব গুরু পাঠ জোই সীঝই । টীকায় "মজ্জন্তি" পাঠ নাই । অবস মরি জাই, তিব্বতী অনুবাদে মৃত্যু প্রাপ্ত হয় । অবস = সং অবশ্য ; ইহার তিব্বতী অনুবাদ নাই । সরহের দোহায় অবস = অবশ্য । বাগ্‌চীর সংস্কৃত অপমৃত্যু যাতি । ইহা টীকা কিংবা তিব্বতী সমর্থন করে না ।

৩৩ নং। মূল— বেঙ্গ (গ) সংসার বড়হিল জাঅ ।
 বেঙ্গস সাপ বড্‌হিল জাঅ (বাগ্‌চী)

আমার পূর্বতন পাঠ ছিল 'বেঙ্গ সাপ সম চড়িল জাই' । আমার সংশোধিত পাঠ 'বেঙ্গস সাপ চড়িল জাই' । ইহা তিব্বতী অনুবাদ অনুযায়ী even the serpent is being chased by the frog. ইহার অর্থ হইল, বেঙ্গ দ্বারা সাপ আক্রান্ত হয় । চড়াই আক্রমণ অর্থে বাঙ্গালা এবং হিন্দীতে প্রচলিত । হিন্দীতে চঢ্‌ ধাতু । বেঙ্গসঁ—সঁ করণ বিভক্তি ।

৩৪ নং। মূল — ইন্দী জানী । বাগ্‌চী ঐ । অর্থ, ইন্দ্রিয়ং জ্ঞাত্বা । তিব্বতী অনুযায়ী ইন্দ্রজাল । আমার পাঠ ইন্দীজালী, অর্থ ইন্দ্রিয়সমূহ । সংস্কৃতে জাল শব্দ সমূহ অর্থে ব্যবহৃত হয় । ল এবং ণ-এ মিল, যথা নিবাণে", পণালে", (চর্যা ২৭ নং) । ৩০ নং চর্যায় ইন্দ্রিআল = ইন্দ্রিয়জাল, টীকায় ইন্দ্রিয়সমূহ ।

৪০ নং। মূল — কালে" বোব । কালে বোব (বাগ্‌চী) । অর্থ--বধিরেণ মুক : । কাল বোবেঁ (মদীয়) । অর্থ—বোবদ্বারা কাল । বাগ্‌চীর পাঠ সং টীকা অনুযায়ী ; কিন্তু কালাদ্বারা বোবাকে বোঝান অসঙ্গত । তিব্বতী অনুযায়ী বোবদ্বারা কাণাকে (অন্ধকে) । তিব্বতীতে "কাল" অর্থে "কান" (অন্ধ) ভ্রমক্রমে । উপরে বলা হইয়াছে "গুরু বোব (বোধ) সে সীসা কাল" — গুরু বোবা, সেই শিষ্য কাল ।

৪৯ নং। মূল—বাজ্জ গাব। রাজ্জ-নাব (বাগ্‌চী)। অর্থ রাজ্জ-নোঃ। ইহা তিব্বতী অনুযায়ী বটে। কিন্তু বাজ্জ গাব অর্থে বজ্জযান রূপ নৌকা। ইহা সঙ্গত। তিব্বতীতে মূল বাজ্জ স্থানে “রাজ্জ” পাঠ ভ্রান্ত।

মূল — অদয় বঙ্গালে (দঙ্গালে) ক্লেশ (দেশ) লুড়িউ। অদয় বঙ্গালে দেশ লুড়িউ (বাগ্‌চী)। অদয় বঙ্গাল দেশ লুড়িউ (মদীয়)। বাগ্‌চীর পাঠ সং টীকা অনুযায়ী। মদীয় পাঠ তিব্বতী অনুযায়ী। বাগ্‌চীর পাঠে অদয় (নির্দয়) বাঙ্গাল দ্বারা দেশ লুগ্ঠিত হইল। মদীয় পাঠে অদয় (অদয়) রূপ বঙ্গাল দেশ লুট করিলাম। আত্মস্ত বিচার করিলে এই পাঠই সঙ্গত। বজ্জযান রূপ নৌকায় পাড়ি দিয়া প্রজ্জারূপ পদ্মার খালে প্রবেশ করিলাম এবং অদয়রূপ বাঙ্গালা দেশ লুট করিলাম। ইহার গূঢ়ার্থ হইতেছে, বজ্জযানের সাধনায় প্রজ্জালাভ করিয়া অদয় সিদ্ধি পাইলাম।

৫০ নং। মূল — হেঞ্জে। বাগ্‌চী ঐ। অর্থ প্রহত্য। হিএ* (হিঞ্জে) (মদীয়)। সং টীকা হৃদয়েন।

মূল — কঙ্গুরিণ। কঙ্গুরি (বাগ্‌চী)। কঙ্গুচিন (মদীয়)। সং টীকা অঙ্গচিন। তব্বত। কম্গুচন। অর্থ কাংনি, সংস্কৃত কঙ্গু, কঙ্গুনী *panicum italicum*।

মূল — চারি বাসে ভাইলা (টীকায় গড়িল) রে* দিআ* চঞ্চালী। চারি বাসে* ভাইলারে দিআ চঞ্চালী (বাগ্‌চী)। চারি বাঁসে গড়িলা রে দিআ* চঞ্চালী (মদীয়)। চঞ্চালী তিব্বতী অনুযায়ী *smyug ma'i rib-ma* বাঁশের বেড়া। কিন্তু তিব্বতী টীকায় চঞ্চালী স্থানে *gtum-mo* চঞ্চালী। মদীয় পাঠে অর্থ, চারি বাঁশ গড়িল দিয়া চাঁচাডী। কিন্তু তিব্বতীর টীকার পাঠে অর্থ, চঞ্চালী দিয়া চারি বাঁশ গড়িল। মূলে প্রকৃত পাঠ ছিল ‘চৌড়লী’। তাহাতে অর্থ হইবে, চারি বাঁশ দিয়া গড়িল রে চৌড়লী (মড়ার খাট)। ইহাতে পরের চরণের ‘তঁহি তোলি’ (তাহাতে তুলিয়া) বাক্যাংশের সহিত বেশ অর্থে মিল হয়।

মূল — নিরবণ। বাগ্‌চী ঐ। নিব্বাণ কিংবা নিচেবণ (নিশেচতন) (মদীয়)। নিরবণের অর্থ নিবৃত্ত হইতে পারে না। তিব্বতীতে *mya nan' das* = নিব্বাণ।